

Na osnovu člana 19. Stav 1. Zakona o Vladi Federacije Bosne i Hercegovine („Službene novine Federacije BiH“, broj 1/94, 8/95 i 19/03), a u vezi sa članom 4. i 5. Zakona o izmjenama i dopunama Zakona o početnom bilansu stanja preduzeća i banaka („Službene novine Federacije BiH“, broj 47/06), Vlada Federacije Bosne i Hercegovine donosi:

UREDBU
O NAČINU KORIŠTENJA NAPLAĆENIH NOVČANIH SREDSTAVA IZ PASIVNOG
PODBILANSA PREDUZEĆA I BANAKA

Član 1.

Ovom Uredbom utvrđuje se način naplate, korištenja i raspodjele naplaćenih novčanih sredstava iz pasivnog podbilansa preduzeća i banaka sa teritorije Federacije Bosne i Hercegovine.

Predmet ove Uredbe su novčana sredstva koja su dobijena:

- prodajom stvari i prava sa pripadajućim kapitalom preduzeća i banaka iz člana 4. i 5. Zakona o izmjenama i dopunama Zakona o početnom bilansu stanja preduzeća i banaka („Službene novine Federacije BiH“, broj 47/06) i privatizovanih preduzeća i banaka koja nisu pod kontrolom te nisu bila uključena u aktivnu podbilansu,
- naplatom potraživanja nastalih 31.3.1992. godine prema pravnim licima iz drugih država i država nastalih raspadom bivše Socijalističke Federativne Republike Jugoslavije.

Član 2.

Novčana sredstva ostvarena iz člana 1. ove Uredbe uplaćuju se na poseban račun Agencije za privatizaciju u Federaciji Bosne i Hercegovine (u daljem tekstu: Agencija) do formiranja Direkcije za upravljanje pasivnom podbilansom preduzeća i banaka (u daljem tekstu: Direkcija).

Član 3.

Novčana sredstva iz člana 1. ove Uredbe, raspodjeljuju se kako slijedi:

- Direkciji u skladu sa članom 7. Zakona o izmjenama i dopunama Zakona o početnom bilansu stanja preduzeća i banaka („Službene novine Federacije BiH“, broj 47/06).
- za rezervisanje sredstava za izmirenje obaveza iz pasivnog podbilansa preduzeća i banaka kao i izmirenja troškova nastalih u vezi zaštite imovine i prava, imovinsko-pravnih sporova i sl.,
- finansiranje Agencije do visine sredstava planiranih za poslove pasivnog podbilansa utvrđenih u finansijskom planu odobrenom od Vlade Federacije Bosne i Hercegovine (u daljem tekstu: Vlada Federacije).

- za pokriće neisplaćenih obaveza prema FPiO/MiO i fondovima zdravstvenog osiguranja, zavodima za zapošljavanje, preduzeća namjenske i nenamjenske industrije čiji su programi izvršeni i koji iskazuju potraživanja u pasivnom podbilansu za obavljene poslove/usluge u inostranstvu (od Yugoimport-SDPR, Yumbes, Kuvajt, Iran, Indija, Angola, Peru, Kuba i dr.).

Član 4.

Dio novčanih sredstava iz člana 1. preostalih nakon izdvajanja iz člana 3. ove Uredbe koristit će se za:

- izmirenje dijela troškova privatizovanih, dijelom privatizovanih i neprivatizovanih preduzeća nastalih u postupku zaštite, potraživanja iz pasivnog podbilansa,
- finansiranje kantonalnih agencija do visine sredstava planiranih za poslove pasivnog podbilansa utvrđenih u finansijskom planu odobrenom od nadležne vlade.

Član 5.

Odluku o raspodjeli novčanih sredstava iz člana 3. i 4. ove Uredbe donosi Vlada Federacije na prijedlog Agencije/Direkcije uz mišljenje nadležnog ministarstva.

Član 6.

Agencije/Direkcija će propisati oblik i formu vođenja centralne evidencije naplaćenih/utrošenih sredstava kao i stanju novčanih sredstava iz pasivnog podbilansa.

Agencija i kantonalne agencije su obavezne po zahtjevu Direkcije dostavljati ažurirane izvještaje o stanju stvari, prava i obaveza iz pasivnog podbilansa, a najmanje jedanput mjesečno.

Član 7.

Agencija/Direkcija je obavezna dostavljati Upravnom odboru Agencije/Direkcije izvještaj o prilivu, odlivu i stanju računa dva puta godišnje, a Upravni odbor Agencije/Direkcije će nakon usvajanja izvještaja isti dostaviti Vladi Federacije.

Član 8.

Ovu Uredbu će provoditi Agencija do formiranja Direkcije.

Član 9.

Ova Uredba stupa na snagu narednog dana od dana objave u „Službenim novinama Federacije BiH“.

